

K'ipa JUAN

2 de Juanbi kallari parluguna

Jesús agllusha kachushka Juanchu ña yuyij gashami kai libroda escribisha Diosbujlla gaj tandanukushka crijkunamu kachashka.

Crijkunada saludashkamunda

¹ Crijkunada pushaj yuyij gashami alli nishka agllushka warmimu paibuj churi ushigunamush* escribini, paigunada kabishkadimi k'uyani, na ñukallashchu ashtanbish kabishka parluda tuki yachi chayujkunashmi; ² chi kabishka parluga ñukuchibi gagushkallamundami k'uyani, ima uragamash ñukuchin gagungallami. ³ Taita Diosmundash Taitabuj Churi Jesucristomundash kushka alliguna, ñukuchida llakishka, k'uilla kausish ñukuchin kabishkabi k'uyibishmi ganga.

K'uyanukusha kausanamunda

⁴ Kambuj wawagunapuramunda maijinguñaga Taita Dios mandushkada ñukuchi japishka shina kabishkada rurusha purigujta rikusha pachundimi kushiyagani. ⁵ Kununga warmilla, kaishujkun chaishujkun k'uyanukuchunmi mañabani. Kaida kangunamu escribigushkaga na mushuj mandashkachu, ashtangarin kallarimunda pacha charishkalladimi gan.

* **1:1** 1.1 Agllushka warmi nishaga, Dios agllushka tandanukushka crijkunadami shina nin.

⁶ K'uyiga kaimi gan: Paibuj mandashkagunabi nishka shina kausana. Kai mandashkaga, kanguna kallirimunda pacha uyashka shinaga k'uyibi kausachunmi gan.

Llullusha crichijkunamunda

⁷ Kai pachabiga llullusha crichijkunaga taugagunami purin. Paigunaga Jesucristo kabishkadi aichayuj tukusha shamushkadaga na parlujkunachu. Maijin shina rurujka llullusha crichij shinaidi Cristoda p'iñajmi gan. ⁸ Ñukuchi rurashka ama yanga sakirichun, ashtangarin chi ruragushkamunda japinashkada illujtada japingajka kangunallamundadi yuyin gaichi. ⁹ Maijimbish Cristo yachachishkada na katisha ashtandi yalida yachachijka Diostaga na charinchi. Pai yachachishkagunallada ruragujkarin Taitadash Churidashmi charin. ¹⁰ Maijimbish kangunajmu risha kashna yachachishkagunada na yachachij gakiga wasimu ama waiguchinguichichu. <Alli shamushkangui> nishamash ama ninguchichu. ¹¹ Maijin <Alli shamushkangui> nijka paiguna layaidi na allida rurujmi tukun.

Tukuchingaj yuyiguna

¹² Kangunamu ninagunadaga milgalladadi charishash p'angabi tintallanga na escribisha ninichu. Ashtangarin ñukuchi illujta kushiyaringujka kangunandi ñawi ñawi rikunukusha parlanukungumi munani. ¹³ Dios agllashka kambuj ñaña shina gaj crijkunami kangunada <¿Allillachu ganguichi?> nin.

**Diosbuj Shimi - Mushuj Testamento
Quichua, Salasaca Highland: Diosbuj Shimi - Mushuj
Testamento New Testament
El Nuevo Testamento en Quechua, Salasaca Highland**

copyright © 2017 Wycliffe Bible Translators, Inc.

Language: Salasakaguna

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source
files dated 29 Jan 2022
b0fe57c6-ed57-5ba7-b534-b4c32e81012a